

Allagaateqarfeqarneq pillugu Inatsisartut inatsisissaattut siunnersuummut oqaaseqaatit.*Oqaaseqaatit nalinginnaasut*

Allagaateqarfeqarneq pillugu Inatsisartut inatsisissaattut siunnersuutit matuma saqqummiuneqarneranut ilaatigut tunngavigineqarput Kommunit Iluarsaateqqinneqarnissaannik Ataatsimiititaliarpuup 1994-imi isumaliutissiissutaa Katersugaasiveqarneq toqqorsiveqarnerlu pillugit Inatsisartut peqqussutaata nr. 4, 18. maj 1990-imeersup misissoqqinneqarnissaannik kaammattuummik ilaqartoq, aammalu 1995-imi Inatsisartut ukiakkut ataatsimiinneranni katersugaasiveqarneq toqqorsiveqarnerlu pillugit peqqussutit allanngortinneqarnissaannik ilaasortamit siunnersuuteqartoqarnera. Ulluni taakkunani Kultureqarnermut, Ilinniartitaanermut Ilageeqarnermullu Pisortaqarfik peqqussutit iluarsaateqqinneqarnissaa pillugu piareersarluni aallartippoq. Inatsisartut tamarmiullutik isumaqatigiippat ilaasortamit siunnersuutiginartoq aappasaaneerpeqassanngitsoq, iluarsaasseqqinnissamillit siunnersuutit ataatsimoortup utaqqimaarneqarnissaannik naalakkersuisut inassuteqaataat akuersaarlugu. Tamatuma kingorna Kultureqarnermut, Ilinniartitaanermut Ilageeqarnermullu Pisortaqarfik atorfilinnik suliamillu ilisimasalinnik inuttalimmik suliassamik ingerlatitseqqittussanik suleqatigiissitaliorpoq. Suleqatigiissitaq 1995-imi oktoberimi pilersinneqarpoq tassaallunilu Nunatta Katersugaasivianit Allagaateqarfianillu, Nunatsinni Katersugaasiviit Kattuffianit, Katersugaasiveqarneq Allagaateqarfeqarnerlu pillugit Ataatsimiititaliamit, KANUKOKA-mit, aammalu Kultureqarnermut, Ilinniartitaanermut Ilageeqarnermullu Pisortaqarfimmit sinniisunik inuttalik. 1996-imi upernaakkut suleqatigiissitaq killiffik pillugu nalunaarusiamik peqqussutit iluarsaateqqinneqarnissaata imassaa pillugu kaammattuutitalimmik saqqummiivoq.

Allagaateqarfeqarneq pillugu Inatsisartut inatsisissaattut siunnersuut manna tamatumunngalu peqatigitillugu Katersugaasiveqarneq pillugu Inatsisartut peqqussutissaattut siunnersuut suleqatigiissitap killiffimmik nalunaarusiaa aallaavigalugu suliarineqarput.

Inatsisartut inatsisaatigut nr. 14, 1. november 1982-imeersukkut Nunatta Allagaateqarfia pilersinneqarpoq. Inatsisartut inatsisaat Namminersornerulerneq pillugu inatsimmi § 4 tunngavigalugu atuutilersinneqarpoq. 1990-imi nunatsinni toqqorsiveqarneq pillugu inatsimmi tigussaasut pillugit aalajangersakkat Katersugaasiveqarneq toqqorsiveqarnerlu pillugit Inatsisartut peqqussutaanni nr. 4, 18. maj 1990-imeersumut ilanngunneqarput.

Siunnersuutikkut matumuuna allagaateqarfeqarneq pillugu aalajangersakkat Inatsisartut allagaateqarfeqarneq pillugu inatsisaannut immikkoorteqqinneqarnissaat

aammalu Nunatta Katersugaasivianiit Nunatta Allagaateqarfiata, 1990-imi Nunatta Katersugaasivianut Allagaateqarfianullu katunneqartut, immikkoortinniarneqalernissaat siunertarineqanngilaq. Inatsisartut peqqussutaannit nr. 4, 18. maj 1990-imeersumik aqqissuilluartoqarnerunissaa paasiuminarsaasoqarnissaalu kiisalu arlalitsigut erseqqissaasoqarnissaa anguniarneqarput.

Allagaateqarfeqarnermut tunngasutigut ingerlatsineq ajornartorsiutitaqanngilaq. Taamaammat siunnersuutikkut matumuuna pingaarutillit allanngortinniarneqanngillat. Allagaateqarfeqarneq pillugu malittarisassanut atuuttunut oqaaseqaatini erserpoq taakku tassaasut toqqorsiveqarneq pillugu inatsisip siulliup - Inatsisartut inatsisaat nr. 2, 1. november 1982-imeersoq - oqaaseqaatitai naapertorlugit suleriaasiulersimasut ersernerat, siunnersuullu manna tamatumingga ingerlatseqqinnertut isigineqartariaqarpoq.

Allagaateqarfeqarneq pillugu Inatsisartut inatsisissaattut siunnersuutikkut siunertarineqarpoq kalaallit piorsarsimassutsikkut kingornussaasa ilaat siunnersuummi kap. 6 naapertorlugu pisortat suliffeqarfiutaasa allagaateqarfiiniittut ilaatigullu inuit namminneq toqqorsiviiniittut isumannaarneqarnissaat. Siunnersuut manna inatsit alla tamatumani malittarisassaqartitsisoq peqatigalugu saniatigullu atuutissaaq. Assersuutitut taaneqarsinnaapput pisortat oqartussaasuisa nalunaarsuiffii pillugit inatsit nr. 294, 8. juni 1978-imeersoq, aammalu siunnersuut manna peqatigalugu saqqummiunneqartoq Katersugaasiveqarneq pillugu Inatsisartut peqqussutissaattut siunnersuut.

Allannguutitut nutaartatullu taaneqarsinnaapput soorlu siunnersuummi § 16, imm. 1 Nunatta Katersugaasivianut Allagaateqarfianullu toqqortanik tunniussisoqannginnerani suliassat piareersarneqareertarnissaannik aalajangiisoq, kiisalu siunnersuummi § 25 naapertorlugu toqqortat, allanit tikinneqarsinnaanngitsut, atornerarnerini nalinginnaasumik nipangiussisussaataitanerup atuunnera, tassa ullumikkut malittarisassanisut pinnani, taakkunani nipangiussisussaataitaneq atortinneqarsinnaavoq Inatsisartut peqqussutaanni nr. 4, 18. maj 1990-imeersumi § 14, imm. 6, oqaas. 2-ip immikkut akuersissuteqarnikkut atortinneqannginneratigut. Kiisalu siunnersuummi § 26-ikkut toqqortat pissarsiarineqarsinnaanerit atuutinneqanngissinnaavoq toqqortat taakku ima ajortissimatigippata paaqqutarineqartariaqarnerat pissutigalugu pissarsiarineqarsinnaajunnaarpata.

Tusarniaaneq:

Peqqussutissatut siunnersuut tusarniaassutigalugu makkununga nassiunneqarsimavoq Nunatta Katersugaasivia Allagaateqarfialu, Katersugaasiviit Atuagaateqarfiillu pillugit ataatsimiititaliaq, Nunatsinni Katersugaasiviit Kattuffiat; NUKAKA, Kalaallit Nunaanni Kommunit Kattuffiat; KANUKOKA, Ilisimatusarfik, Inatsisartut Allattoqarfiat kiisalu Inatsisileriffimmut. Tusarniaanermut akissutit suliarineqareersimapput, atorluarneqarsinnaassussaallu naapertorlugit peqqussutissatut siunnersuummut ilanngunneqarsimallutik.

Allaffissornikkut aqutsinermi aningaasatigullu kingunissai:

Allagaateqarfeqarneq pillugu Inatsisartut inatsisissaattut siunnersuut manna allaffissornikkut aningaasatigullu allannguutinik kinguneqartussatut naatsorsuutigineqanngilaq.

-

Aalajangersakkanut ataasiakkaanut oqaaseqaatit:

Kapitali 1

§ 1

Aalajangersagaq Inatsisartut peqqussutaannut nr. 4, 18. maj 1990-imeersumi siunertamik aalajangersakkamut sanilliullugu itisiligaavoq. Peqqussut siunnersuullu manna siunertamikkut assigiinngissuteqanngillat.

Inatsisikkut siunertarineqartoq pingaarneq tassaavoq kinguaassat oqaluttuarisaanikkut najoqqutassaqartinneqarnissaat. Allagaateqarfiup pisortat oqartussa qarfiini sullissiveqarfiinilu kalaallit piorsarsimassutsikkut kingornussa at ingerlatissavai ingerlateqqittassallugillu. Aamma tamanna atuutissaq allagaateqarfiup inunnit ataasiakkaanit suliffeqarfinnillu il.il. siunnersuummi § 2, imm. 1-2-imi pineqanngitsunit toqqortanik tigusaanut.

Toqqorterineq nalunaarsuinerlu pillugit naleqquttumik inatsiseqarnerup kingunerissavaa Pisortat ingerlatsinerat pillugu Inatsisartut inatsisaat nr. 8, 13. juni 1994-imeersoq malillugu aammalu Pisortat ingerlatsineranni paasitinneqarsinnaatitaaneq pillugu Inatsisartut inatsisaat nr. 9, 13. juni 1994-imeersoq malillugu suliat allagartaanik pissarsisinnaatitaaneq pillugu malittarisassat ajornanninnerusumik piviusunngortinneqarsinnaalernerat.

Kiisalu nukissat killeqarnerat pissutaalluni toqqortat ilaasa qanoq amerlatigisut toqqortarineqarsinnaaner at killeqarpoq. Taamaamm at inatsisikkut siunertarineqartoq alla tassaavoq toqqortat toqqortarineqarnissaminnut naleqqutinngitsut atortussaajunnaarsinneqarsinnaalernerat. Assersuutissaatut taaneqarsinnaapput assileqqitat pisariaqanngitsut aammalu suliat assigiaaginnartut taamaallaat ataasiakkaanut tunngasutigut soqutiginaateqartut.

Inatsisikkut aamma siunertarineqarpoq toqqortat kikkunnilluuniit pissarsiarineqarsinnaalernissaat siunnersuummi kap. 5-imi aalajangersakkat naapertorlugit. Toqqortanik taamaattunik pissarsiumasut siunnersuutikkut immikkut piumasqaateqarfigineqanngillat. Taamaalilluni kikkut kikkulluunniit toqqortanik oqaluttuarisaanermi najoqqutassanik pissarsisinnaalerput.

§ 2

Aalajangersagaq imarisamigut Inatsisartut peqqussutaannut nr. 4, 18. maj 1990-imeersumut § 7-imut naapertuuppoq. Maleruaqqusat maanna utuuttut Namminersornerullutik Oqartussat suliffeqarfiutaannut tamanut atuuppoq. Tamanna isumaqarpoq peqqussutip atuuffissaa paasitinneqarsinnaatitaaneq pillugu inatsimmit suliaassallu suliarineqartarnerat pillugu inatsimmit annertunerunera, tunngaviusumiuk Inatsisartut oqartussaqaarfiillu taakkununga atasut ilaatinneqarmata. Inatsisinut tunngaviusunut oqartussaassutsimik killiliinikkut il.il. ajornartorsiuteqartoqalinnginnissaa qulakkeerniarlugu, siunnersuummi uani Inatsisartut oqartussaqaarfiillu taakkununga atusut allagaateqarfeqarnikkut pissusaat Inatsisartut siulittaasoqarfianit aalajangersarneqartasapput.

Imm. 1

Pisortat ingerlatsinerat paasitinneqarsinnaatitaaneq pillugu inatsimmi § 1, imm. 1-imisut killilerneqarpoq.

Inatsit pisortat ingerlatsiviinut tamanut atuuppoq apeqqutaatinnagu Namminersornerullutik Oqartussaniinnersut kommunilluuniit ingerlatsiviiniinnersut, aamma apeqqutaatinnagu ingerlatsinikkut oqartussaniunersut, immikkut ataatsimiititalianiunersut siunnersuisoqatigiinniunersulluuniit - soorlu ilagiit sinnersaannit aallartitat naammagittaalliortarfillu - imaluunniit ingerlatsiviit immikkut ittuniinnersut. Inatsit oqartussaqaarfinnut siunnersuinerinnarmik suliaqartunut kiisalu ataatsimiititaliaagallartunut aamma atuuppoq. Allagaateqarfeqarnermut tunngasutigut § 9 naapertorlugu immikkut malittarisassiornermi ingerlatsiveqarfinni immikkut ittuni pissutsit isiginiarneqarsinnaapput.

Oqartussaqaarfiit sullissiveqarfiillu sorliit pisortat ingerlatsiviisut naatsorsuuneqassanersut pillugit aalajangiinermi aaqqissuussaanikkut inissisimanerat pingaartinneqassaaq, aatsaallu nalornisoqartillugu suliffeqarfiup oqartussaqaarfiilluunniit sunik suliaqarnera najoqqutarineqartassaaq. Suliffeqarfik namminersortutut aaqqissuunneqarsimappat, soorlu suliffeqarfittut imminut pigisutut peqatigiiffittulluunniit, taakku inatsisip atuuffiata avataaniissapput aatsaallu imm. 1-imi pineqartunut ilaatinneqassallutik suliffeqarfik ingerlatsinikkut oqartussat nalinginnaasumik suliarisartagaannut nallersuunneqarsinnaasumik suliaqarpat aammalu aatsaat pisortat aqutsinerannit nakkutilliinerannillu annertuumik qulangersimaneqarpata.

Kommunit suleqatigiiffii, soqutigisaqatigiiffittut imminnut taagortut, piginneqataassuteqarluni ingerlatseqatigiiffiit namminersortutullu taagukkat allat aammalu kommunini aqutsineq pillugu inatsit naapertorlugu akuerineqartussat inatsimmi aamma pineqarput.

Akerlianik aalajangersakkap kingunerisaanik inatsit naalagaaffiup Kalaallit Nunaanni ingerlatsiviinut atuutinngilaq, tassa Naalagaaffiup Sinniisoqarfianut,

eqqartuusivinnut politiinullu, aamma naalagaaffiup oqartussaasuisut taaneqartartunut. Aamma takukkit § 3-mut oqaaseqaatit.

Imm. 2

Aalajangersakkap oqaasertai Inatsisartut peqqussutaannut nr. 4, 18. maj 1990-imeersumut sanilliullugit allanngortitaapput tassaniami "pisortat suliffeqarfiutaat" pineqartillugit sullissiveqarfiit imminnut pigisut namminersortullu tamaakkisumik annerusumilluunniit pisortat aningaasaliissutaannit ingerlanneqartut pisortalluunniit sinnerlugit suliallit ilaatinneqarmata. Tamatumunnga pissutaavog suleriaatsimut naapertuutilersitsiniartoqarnera, suleriaaseq taanna aamma pisortat ingerlatsinerat pillugu inatsisinut soorlu kikkulluunniit pissarsisinnaanerat pillugu inatsimmi ilaatinneqartut ilanngunneqarnissaannik siunertaqarpoq.

Imm.2 suliffeqarfinnut, ingerlatseqatigiiffinnut, peqatigiiffinnut il.il. namminersortunut aqqissuusaanerat apeqqutaatinnagu tunngavog.

Sullissiveqarfiit il.il. taamaattut inatsimmit ilaatinneqarnissaat naalackersuisut aalajangersinnaavaat sullissiveqarfiit sulinerat annerusumik Namminersornerullutik Oqartussanit kommuninilluunniit aningaasalersorneqarpat. Aningaasanik nuussisarneq amerlanertigut toqqaanartumik tapiissutitigut pisassaaq, aalajangersagarli aamma atuuppoq suliffeqarfiup aningaasartuutai ilaasortat akiliutaannit assigisaannilluunniit matussuserneqartarpata imaluunniit pisortat oqartussaarfii sullissinermut akiliisartillugit. Taamaattoq pisortat aningaasartuutit "amerlanersaannik" akiliisarnissaannik piomasagaatip kinguneraa pisortat akiliutaat aningaasartuutitut tamarmiusunut sanilliullugit annertungaatsiartarnerat, tassa taakku 60-70 pct.-ii ataassimassanagit. Aalajangersagaq taamaallaat ingerlatsinerup akilerneqarneranut tunngavog taamalu soorlu ingerlatseqatigiiffimmi pisortat aktiatigut piginneqataassusaasa annertussusiannut atorniarneqarsinnaannani.

Inatsit aamma suliffeqarfinnut Namminersornerullutik Oqartussat kommunilluunniit sinnerlugit ingerlatsinikkut aalajangiisnaatitaasunut atuuppoq. Ingerlatsinikkut aalajangiisnaatitaaneq suliffeqarfiup inunnut suliffeqarfinnulluunniit ataasiakkaanut tunngasunik inaarutaasumik aalajangiisarnernanut tunngavog. Taama pisinnaatitaaffeqarneq toqqaanartumik inatsisiliornikkut tunniunneqarsinnaavog imaluunniit inatsimmik tunngaveqarluni suliffeqarfimmut oqartussaniit tunniunneqarsinnaalluni.

Naalackersuisut aalajangerpata sullissiveqarfiit il.il. taamaattut inatsimmi aamma ilaatinneqassasut tamatumunnga suliffeqarfiup il.il. ilisimatinneqarsimanissaa piomasagaataavog.

Imm. 3

Tulliuttuni uteqattaarisogarnissaa pinngitsoorniarlugu aalajangersagaq ilanngunneqarpoq.

Imm. 4

Siuliani taaneqartutut malittarisassat aamma tunngaviatigut Inatsisartunut taakkulu oqartussaasoqarfiinut suliffeqarfiinullu atuutissapput. Siunnersuummi matumani siunnersuutigineqarpoq malittarisassat Inatsisartunut taakkulu oqartussaasoqarfiinut suliffeqarfiinullu atuuttussat Inatsisartut siulittaasoqarfiannit aalajangersarneqartassasut. Tamanna pissuteqarpoq kissaatigineqarmat oqartussaaffiit killilerneqarneri il.il. eqqarsaatigalugit tunngaviusumik inatsisitigut ajornartorsiortoqalinnginnissaa.

Inatsisartut siulittaasoqarfiata malittarisassat aalajangersassavaat Naalackersuisut isumaqatiginiareerlugit. Taamaaliornikkut qularnaarniarneqassaaq Namminersornerullutik Oqartussani allagaateqarfeqarnermut tunngasut pillugit assigiikannersunik malittarisassaqaarnissaq. Naatsorsuutigineqarpoq Nunatta Katersugaasivia Allagaateqarfialu isumaqatigiinniarnerni taakkunani peqataatinneqarsinnaassasut, tassaniimmatami Kalaallit Nunaanni allagaateqarfeqarneq pillugu immikkut ilisimasat katersorneqarsimasut.

§ 3

Aalajangersagaq Naalackersuisunik naalagaaffimmi oqartussanut isumaqatigiissuteqarsinnaatitsisoq Inatsisartut peqqussutaanni nr. 4, 18. maj 1990-imeersumi § 26-imut naapertuuppoq.

§ 3 tunngavigalugu naalagaaffiup allagaateqarfissua, Rigsarkivet, sinnerlugu suliassat isumagineqarnissaannik Ministeriuneqarfik isumaqatigiissuteqarfigineqarsinnaavoq. Naalagaaffiup oqartussaasoqarfiinit toqqortat tunniunneqarnissaat atorneqarnissaallu pillugit piumasaqaatinik isumaqatigiissusiorsinnaanermik aalajangersagaq ilaatigut imaqarpoq. Ullumikkut naalagaaffimmi oqartussaasut isumaqatigiissuteqarfigineqarput toqqortat Nunatta Katersugaasiviani Allagaateqarfianilu toqqorsimaneqarnissaannik. Allagaatit isumaqatigiissut taanna malillugu toqqorsimaneqartut kikkunnilluunniit pissarsiarineqarsinnaanngillat.

Kapitali 2.

§ 4

Imm. 1

Aalajangersagaq imarisamigut Inatsisartut peqqussutaanni nr. 4, 18. maj 1990-imeersumi siunertatut aalajangersakkamut Nunatta Katersugaasivita Allagaateqarfialu toqqorsiveqarnikkut pisussaaffiinut tunngasumut naapertuuppoq. Siunertaavoq kinguaassat pisortat sullissiveqarfiisa toqqortaanniittunik oqaluttuarisaanermi najoqqutaqartinneqarnissaat, aamma takukkit oqaaseqaatit nalinginnaasut aammalu § 1-imut oqaaseqaatit.

Nunatta Katersugaasivia Allagaateqarfialu inuit ataasiakkaat toqqortaataanik isumaginnittussaataavoq taamaallaat taakku tassunga tunniunneqarsimappata tassangalu tiguneqarsimappata. Toqqortat § 1, imm. 1 nr. 1-imisut ittunik inuit ataasiakkaat toqqortaataanik tigusinissaminik itigartitsisinnaangilaq. Inuk tunniussisoq allanik piumasqaateqarsimangippat Inatsisartut peqqussutaat nr. 4, 18. maj 1990-imeersoq inatsisiliornerluunniit alla naapertorlugu katersugaasivinni akuerisaasuni taakku toqqortarineqarnissaannut akornutissaqanngilaq, aamma takukkit imm. 3-imut oqaaseqaatit.

Imm. 2

Ilisimatusarnek oqaluttuarisaanermik ilisimatusarnermut taamaallaat tunngatinneqanngilaq aammali ilisimatusarnermut allanut oqaluttuarisaanermi paasisutissanik tunngaveqartunut tunngatitaalluni. Nunatta Katersugaasiviata Allagaateqarfialu nammineq ilisimatusarnerminit paasisaminik ingerlatitseqqittussaataanerme saniatigut ilisimatusartut avataaneersut paasisaasa ingerlateqqinneqarnissaannut killilimmik pisussaaffeqarpoq, takuuk aalajangersakkap naggataa; "Kalaallit Nunaata piorsarsimassutsikkut inuiaqatigiitsigullu ineriartorneranik ilisimanninneq siaruartissallugu".

Imm. 3

Aalajangersakkakut Nunatta Katersugaasivia Allagaateqarfialu katersugaasivinnik akuerisaasunik toqqortanillu nammineq pilersinneqarsimasunik, tamakku amerlassusii naapertorlugit, toqqorsineqarnerup tungaatigut suleqateqarnissaminik pisussaaffilerneqarpoq. Taamaaliornikkut ulloq manna tikillugu inatsisitigut inissisimaneq § 3, imm. 1, nr. 5 malillugu pilersooq attatiinnarneqarpoq, tak. § 1 Inatsisartut peqqussutaanni nr. 4, 18. maj 1990-imeersumi. Suleqatigiittussaataanermet aamma ilaavoq Nunatta Katersugaasiviata Allagaateqarfialu nunatsinni ilisimatusarnermut tamarmiusumut peqataanissaminik pisussaaffeqarnera aamma takukkit imm. 2-mut oqaaseqaatit.

Nunatta Katersugaasivia Allagaateqarfialu imaaliallaannaq Danmarkimi nunanilu allani suliffeqarfinnik assingusunik suleqateqarnissaminik pisussaaffilerneqanngilaq. Taamaattorli suleqatigiinneq taamaattoq amerlasoorpassuartigut toqqorsiveqarnerup pitsaassusaanut iluaqutaasussaavoq, soorlu paasisutissanik pissarsisarnermi, sulisut ilinniartitaanerisigut, suliassanik immikkut ittunik suliaqarnermi aammalu toqqorsiveqarnermik sulianut tunngasutigut oqallitarnikkut. Naatsorsuutigisariaqarporli tamatumani suleqatigiinneq ingerlatiinnarneqassasoq.

§ 5

Imm. 1

Aalajangersagaq Inatsisartut peqqussutaat nr. 4, 18. maj 1990-imeersumi § 9-imut naapertuuppoq, qallunaatuuaanili allannguisoqatsiarpoq tassa "konsulent" atorneqarani "rådgiver" atorneqarmat. Taamaaliornikkut allannguinartoqanngilaq.

Akerlianik erseqqissarniarneqarpoq toqqorsinissamut akisussaasoq tassaasoq suliffeqarfik. Nunatta Katersugaasiviata Allagaateqarfiatalu suliassaa tassaavoq suliffeqarfinnik suliassanik pitsaasumik aqqissuinerani ikiussallugit aammalu suliat toqqortat nassaareqqipallanneqarnissaannut, nammineq atugassatut innuttaasulluuniit suliamut tunngasunik paasisaqtussaataitaanerannut atatillugu periarfissaqalernissaannut ikiuissalluni.

Nunatta Katersugaasiviata Allagaateqarfiatalu suliassaasa pingaernerit ilagaat oqartussaarfiiit sullissiveqarfiillu toqqorsiveqartut nalunaarsuiffiliornerini il.il. ikiuinissaq. Qarasaasianut, sulianik pilersitsinermut il.il. tunngasutigut siunnersuineq aamma ilanngunneqarpoq. Nunatta Katersugaasiviata Allagaateqarfiatalu siunnersuinikkut qularnaarniarpaa toqqortat pigiinnarneqartariaqartut siunissami qaninnerusumik aanaaveersaanissaq pisariaarullugu atortulersorneqarnissaat - tassa pappilissanik, allaatinik, il.il.. Siunnersuineranut aamma ilaavoq init toqqorsiviit nutaat pilersarusiorneqarnerat. Pilersaarutit taakku init atorneqalersinnagit Nunatta Katersugaasivianut Allagaateqarfianullu saqqummiunneqqaartariaqarput.

Imm. 2

Aalajangersagaq Inatsisartut peqqussutaanni nr. 4, 18. maj 1990-imeersumi § 3, imm.1, nr. 3-mut sanilliullugu nakkutilliisussaataitaanerup annertusineqarneranik imaqarpoq tassa ulloq manna tikillugu nakkutilliisussaataitaaneq toqqortanut najukkani suliffeqarfinniittuinnarnut tunngammat. Akerlianik aalajangersagaq nutaaq ulloq mannanut suleriaasiusumut naapertuuppoq tassami Nunatta Katersugaasiviani Allagaateqarfianilu toqqorsisartut akuttunngitsumik pisortat suliffeqarfiutaannut allanut alakkaasarmata.

Nakkutilliisussaataitaanerup nassataanik Nunatta Katersugaasiviani Allagaateqarfianilu toqqorsisartuusut akuttunngitsumik pisortat suliffeqarfiutaannut misissuiartortassapput. Kommunit toqqortaminnik passussinerminni inatsisinik unioqqutsitsinersut, imaluunniit taakkuninnga tunngaveqarluni malittarisassaliarinqarsimasunik unioqqutsitsinersut nalinginnaasumik kommuninik nakkutilliinermut ilaavoq - tassa Kommuninik Nakkutilliisoqarfiup suliaanut. Toqqorsiveqarnermut tunngasutigut annertuumik sumiginnaanerat Nunatta Katersugaasiviata Allagaateqarfiatalu Kommuninik Nakkutilliisoqarfimmut nalunaarutigisassavai.

Kapitali 3.

Pisortat suliffeqarfiutaat ataasiakkaat toqqorterinissaminnik pisussaaffeqarput. Nunatta Katersugaasiviata Allagaateqarfiatalu suliassaa tassaavoq suliffeqarfinnik suliassanik pitsaasumik aqqissuinerani ikiussallugit aammalu suliat toqqortat nassaareqqipallanneqarnissaannut, nammineq atugassatut innuttaasulluunniit suliamut tunngasunik paasisaqtussaataitaanerannut atatillugu periarfissaqalernissaanni ikiussallugit. Taamaattoqassappat toqqorsiviit naleqquttut

peqqissaarnerlu atorneqartariaqarput, kiiisalu atortut paasissutissartallit pitsaasut atorneqarnissaat aamma pisariaqarluni.

§ 6

Aalajangersagaq Inatsisartut peqqussutaanni nr. 4, 18. maj 1990-imeersumi § 8-imut naapertuuppoq.

Toqqorterinermi pineqarput atortut paasissutissartallit tamarmik. Tassaaginnangillat pappilissat qanganilli atorneqartut aammali nunat immallu assingi, titartakkat, pilersaarutit, assit, nuutsitat, filmit mikrofilmillu, oqaluttartut nuutaat, båndit nipitallit assiliartallillu. Qarasaasiatigut paasissutissat aamma toqqorneqartassapput. Qarasaasiatigut toqqortanut ilaapput paasissutissat maskinamit atuarneqarsinnaasut tamarmik, tassa allagartat putoortullit hulkortit, putoortullit takisuut hulstrimler, magnetbåndit, pladelagret, diskettit il.il. kiiisalu atortut paasissutissallu taakkununga toqqaannartumik tunngassuteqartut, tassa soorlu aqqissuussinerit nassuiarneqarnerat, atuinermik ilitsersuutit aammalu uppernarsaatit nalunaarsuiffiillu allat. Isernermut aninermullu paasissutissat, soorlu nalunaarutininut skemat, printlistit, blankettit, COM-filmit atornissaat maskinanik atortoqarfiusariaqanngitsut qarasaasiakkut paasissutissatut naatsorsuunneqanngillat.

Toqqorterisussaaitaanermut aamma ilaapput allaffissornikkut atortut soorlu kartotekit, aternik nalunaarsuiffiit, allakkanut nalunaarsuiffiit, ilinniutit assigisaallu.

Nalunaarsuiffiit inuit pillugit paasissutissartallit toqqorneqarneranni nalunaarsuineq pillugu inatsimmi aalajangersakkat qaqugukkulluunniit atuuttut isiginiarneqartassapput.

§ 7

Imm. 1

Aalajangersagaq taanna § 9 peqatigalugu Inatsisartut peqqussutaanni nr. 4, 18. maj 1990-imeersumi § 8, imm. 2-mut naapertuuppoq. Aamma takukkit § 9-imut oqaaseqaatit.

Pisortat suliffeqarfiutaasa toqqortamik isumannaatsumik suliarineqarnissaat toqqortarineqarnissaallu isumagisassaraat. Tulliuttuni taaguutit allaffinni toqqortat toqqorsivinnilu toqqortat atorneqassapput. Allaffinni toqqortat tassaapput allaffinni inissisimasut suli allaffissornikkut suliaassanik isumaginninnermi atorneqarallartut. Toqqorsivinni toqqortat toqqorsivinniilersarput allaffissornikkut pisariaarukkaangamik, tassaniittarpullu Nunatta Katersugaasivianut Allagaateqarfianullu tunniunneqarnissamik tungaanut.

Suliat naammassineqaraangata allaffimmi toqqorsivimmut inissinneqartassapput. Taamali pisoqannginnerani sulianut mappit salinneqassapput, tassa assilinerit,

nuutsitat sinneri, atuakkat, puui plastikkiusut suliamullu attuumassuteqanngitsut allat peerneqassapput. Eqqortumik saliineq inissarujussuarmik pilersitsisinnaavoq suliallu paasiuminarsisissallugit pilertortumik ujarlerfiusinnaasunngorlugit. Saliinermi aamma saviminiaqqat tasisartullu peerneqartassapput, taakkumi manngertorninermikkut nungujartormikkullu toqqortanik ajoqusiisinnaammata. Aamma takukkit siunnersuummi § 16, imm. 1-imut oqaaseqaatit.

Toqqortat sumilluunniit ajoquserneqartussaajunnaarlugit toqqortarineqartassapput. Init toqqorsivittut atorneqartut pingaarnarpaatut panerluinnartuussapput isugutak toqqortanut aserornarlunnartuummat. Isugutaasinnaasoq qerinermilu qaartoortoqarsinnaanera pinngitsoorumallugu ini imermut ruujoreqanngitsaq toqqarneqartariaqarpoq. Ini susassaqaanngitsunit iserfigineqarsinnaajunnaarneqassaaq. Imermik ikuallannikkulluunniit ajoqusiisoqartillugu Nunatta Katersugaasivia Allagaateqarfialu piaartumik ilisimatinneqartariaqarpoq ikiuukkasuartussanik aanaveersaasussanillu piaarnarpaamik aallartisisinnaaqqullugu.

Imm. 2

Aalajangersagaq taanna nutaajuvoq kisiannili Nunatta Katersugaasiviata Allagaateqarfiatalu siunnersorteqarnermigut suleriaaserinialigaanut naapertuulluni. Aalajangersakkakut erseqqissarneqarpoq toqqortat immikkoortut akulerunneqannginnissaat. Tamatuminnga inatsisitigut aalajangiinikkut pisortat sullissiveqarfiisa assigiinngitsut toqqortaataasa akulerunneqannginnissaat qularnaarneqassaaq, aammalu pisortat sullissiveqarfii toqqortassaliorimasut taakkuninngaluunniit aqqutissiiuussisimasut suussusersineqarsinnaanissaat qularnaassallugu.

Paasissutissat pisortat suliffeqarfiutaannut ataatsimut nassiunneqarsimasut suli ataatsimoortinneqassapput toqqortanit allanit immikkoortillugit. Pisortat suliffeqarfiutaat pisortat suliffeqarfiutaannit allaneersunik toqqortanik tamakkiisunik ilaannakuusunilluunniit tiggumiaqaruni taakku immikkut toqqortarissavai, pisortallu suliffeqarfiutaata nammineq toqqortaataanut akulerunneqassanatik. Tamannalu aamma atuuppoq suliffeqarfik pilersimappat sullissiveqarfiit assigiit ataatsimuulersinneqarsimappata aammalu oqartussaqaarfik suliffeqarfiup atortussaajunnaarsinneqartup suliassaqaarfii tigusinerani suliffeqarfiup toqqortaatai tiguineqarsimappata. Tamanna aamma atuuppoq pisortat sullissiveqarfiini akisussaaffiit nuunneqarsimappata, tamanna pillugu takuuk siunnersuummi § 8.

§ 8

Aalajangersagaq nutaajuvoq akisussaaffiullu pisortat suliffeqarfiutaannit allamut nuunneqarneranut tunngasuulluni siornagut malittarisassaqaartitsiviusimanngitsumi. § 7, imm. 2-imi suliat akulerunneqannginnissaannik tunngavigineqartoq aamma tunngavigalugu aalajangersagaq ilanngunneqarpoq; tassa pisortat suliffeqarfiutaasa assigiinngitsut toqqortaataasa akulerunneqarnissaat pinngitsoorniarlugu aammalu kikkut toqqorsisuunersut toqqorsinermulluunniit aqqutaanersut

paasisinnaajumallugu. Aamma qularnaarniarneqarpoq pisortat suliffeqarfiutaat isumannaatsumik suliarinnittarnissaannik toqqortarinninnissamillu piumasaqaammik "nammineq" toqqortaqannginnerminnik aallaaveqarlutik sumiginnaannginnissaat.

Imm. 1

Pisortat suliffeqarfiutaannit suliffeqarfimmut il.il. allanut inatsimmi matumani § 2 naapertorlugu imaaliallaanaq ilaangitsunut nuussisoqartillugu aalajangersagaq aatsaat atuutissaaq suliffeqarfik il.il. tiguisuusoq inatsisip atuuffianut § 2, imm. 2-imi aalajangersagaq malillugu ilan-ngunneqarsimappat.

Imm. 2, oqaaseqatigiit aappaat

Naatsorsuutigineqarpoq aalajangersagaq taamaallaat qaqutiginnaq atorneqartassasoq. Pisut aalajangersakkap atorneqarsinnaaffiisut takorloorneqartut soorlu tassasaapput pisortat suliffeqarfiutaat tiguisuusoq tiguneqartumi suliassaqarfimmi suliassat ataatsimut ataasiakkaalluunniit isigalugit toqqortat taamaattut pisariaqartippagit. Suliffeqarfik il.il. tiguisuusoq inatsisip atuuffianut ilaangippat aalajangersagaq atorneqarsinnaanngilaq.

Imm. 3

Aalajangersagaq suliassaqarfiit nuunneqarnerisigut pisortat suliffeqarfiutaasa suliffeqarfinit toqqortanik tiguseranni suliat akulerunneqartussaannnginnerannik tunngaviup atuuneranik erseqqissaaneruvoq.

§ 9

Aalajangersagaq § 7, imm. 1 peqatigalugu Inatsisartut peqqussutaanni nr. 4, 18. maj 1990-imeersumi § 8, imm. 2-mut naapertuuppoq. Naalakkersuisut suli taamaattunik aalajangersaasimangillat, taamaammallu Nunatta Katersugaasiviani Allagaateqarfianilu danskit malittarisassaanni najoqqutareqquneqartut malillugit suleriaaseqartoqarpoq.

Toqqortat paaqqutarineqarnissaannut tunngatillugu init toqqorsiviit iserfigineqarsinnaassusiat, susassaqaanngitsut eqqarsaatigalugit sillimanissakkut najoqqutassiat, tillinniarfigitinnerit - ikuallattoornerit imerlu aqqutigalugit aserukkat, najukkami pissutsit aammalu illup iluata silaannaa, tassunga ilanngullugit kiassuseq silaannaallu isugutassusia pillugit malittarisassiortoqarsinnaavoq. Piumasaqaatit aalajangiunneqartut aamma soorunami toqqortanut Nunatta Katersugaasivianut Allagaateqarfianullu tunniussanut atuutissapput.

Toqqortat suliarineqartarnerat pillugu suliassat aqqissuunneqarnerat, suliat salinneqartarnerat, atortut, nalunaarsuiffiliorneq minnerunngitsumillu atorunnaarsitsineq pillugu malittarisassanik aalajangersaasoqarsinnaavoq.

Aalajangersakkap ilaata kingunerissavaa malittarisassat kommunit ingerlatsinerannut atuuttussat atuutsinneqalinnginneranni KANUKOKA-mut isumaqatigiinniutigineqartussaanerat. Malittarisassat pisortat suliffeqarfiutaanni allani malittarisassanik atuuttunik aallaaveqartariaqarput.

§ 10

Aalajangersagaq Inatsisartut peqqussutaanni nr. 4, 18. maj 1990-imeersumi § 12-imut naapertuuppoq.

Imm. 1

Imm. 1-imi siusinnerusukkut aalajangersakkami eqqartuussisutigoortillugu pissarsisoqarsinnaannginnera erseqqisarneqarpoq.

Tamanna pissuteqarpoq pisortat suliffeqarfiutaasa toqqortaataasa pisortanit pigineqaannartussaanerannik aalajangersakkamik. Taamaattoq tak. § 8, imm. 1 aamma § 15, imm. 3.

Aalajangersagaq toqqortanut inuttaqanngitsutut taaneqarsinnaasunut atuuppoq, toqqortanut maanna siusinnerusukkullu oqartussaasusimasuneersunut - soorlu niuertorutsinit. Eqqartuussivitsigoorlugu pissarsisinnaaneq pillugu aalajangersaasoqarnera tatiginnilluni pissarsisimaneq pillugu inatsisini malittarisassanut sammivoq.

Imm. 2

Kinaluunniit allagaatinik pigisalik ajunngitsumik isumaqarluniluunniit taakkuninnga pissarsisimappat, taakku Nunatta Katersugaasivianut Allagaateqarfianullu tunniunneqassapput, ajunngitsorsiassaartitsinertaqanngitsumik. Akerlianik pigisanik nalunaarutiginnittarnermut tunngatillugu inatsisitigut malittarisassat tunngaviusumillu inatsisitigut najoqqutarineqartartut tunngavigalugit siusinnerusukkut allagaatinik pigisaqarsimasunut piunasaqartoqartarsinnaassaaq.

§ 11

§ 11-imi aalajangersagaq Inatsisartut peqqussutaanni nr. 4, 18. maj 1990-imeersumi § 9, imm. 2, oqaaseqatigiit pingajuannut naapertuuppoq. Aalajangersagaq § 12-imi nalunaarsuineranut toqqrterinermullu pilersaarutit Nunatta Katersugaasivianut Allagaateqarfianullu saqqummiunneqartussaanerisa aamma Nunatta Katersugaasiviata Allagaateqarfialu § 5, imm. 1 malillugu siunnersuissaanerata pissusissamisoortumik kinguneraa.

Najoqqutassiat ilitersuutaasut Nunatta Katersugaasiviata Allagaateqarfialu aalajangigai § 9 malillugu Naalakkersuisut aalajangigaannut killiliussanut soorunami naapertuuttariaqarput. Nunatta Katersugaasivia Allagaateqarfialu malittarisassat

ilitsersuutaasut innersuussutigalugit peqqussuteqarsinnaanngilaq, taamaakkaluartorli aalajangersakkat piviusumik sunniuteqarput tassami nalunaarsuinnermut toqqorterinermullu pilersaarutit aammalu § 12 naapertorlugu killilimmik pilersaarutaareersut allanngortinneqarnerat Nunatta Katersugaasivianut Allagaateqarfianullu akuerisassanngorlugit saqqummiunneqartussaammata.

Nalunaarsueriaaseq qulequttanut agguataarsimasussaavoq, piffissanilu aalajangersimasuni atorneqartariaqarluni, soorlu ukiut tallimakkuutaarlugit qulikkeuutaarlugilluuniit, taamaaliortoqanngippammi toqqorsivinni atortussaajunnaarsitsisarneq pitsaasoq isumannaatsorlu ingerlanneqarsinnaanngimmat. Qarasaasiakkut nalunaarsuisarnermi amerliartortitsineq piffissanullu agguasaarneq malittarisassat qangatut nalunaarsuisarnermisut atuuttut atuuttariaqarput. Toqqorsiveqqortussuserli eqqarsaatigalugu piffissat nalunaarsuiffiusartut sivikinnerusut atorneqartariaqarsinnaapput.

Maleruagassat ilitsersuutaasut ullumikkut ukunani nassaassaapput "Pisortat suliffeqarfiutaasa toqqorsivii - Toqqortanik toqqortarinninneq, tunniussineq atorunnaarsitsinerlu pillugit aalaja-ngersakkat ilitsersuutillu" Kalaallit Nunaata Allagaateqarfiata 1987-imi saqqummersitai aamma "Nunatsinni kommunini toqqortanik toqqortarinninneq atorunnaarsitsisarnerlu pillugit aalaja-ngersakkat" 1991-imi Nunatta Katersugaasiviata Allagaateqarfiatalu saqqummersitaani.

§ 12

§ 12 Inatsisartut peqqussutaanni nr. 4, 18. maj 1990-imeersumi § 9, imm. 2, oqaas. 1 aamma 2-mut naapertuuppoq. Aalajangersagaq Nunatta Katersugaaviata Allagaateqarfiatalu toqqortat suliarineqartarnerinik nakkutilliisussaataitaneranut aammalu sullissiveqarfiit soqutigisaattut suliat pitsaasumik ingerlanneqarnerisa anguneqarnissaasa aammalu suliat toqqortagineqartut sukkaasumik nassaarineqarsinnaanissaasa eqqarsaatigisariaqarnerannut tunngavoq.

Imm. 1

Nalunaarsuinnermut toqqorterinermullu pilersaarutinik piusunik aalajangersagaasimasut malillugit suli akuerineqarsimanngitsunik peqarpat taakku imm. 1-imi aamma pineqassapput.

Imm. 2

Nalunaarsuinnermi immikkoortut allat nalunaarsueriaasioreersut iluanni pilersinneqassappata akuersissummik peqqaarnani tamanna pisinnaavoq.

§ 13.

Nunatta Katersugaasivia Allagaateqarfialu toqqortat paariinnarnissaat pisariaqanngitsut atortussaajunnaarsinneqarnissaat pillugit ilitsersuutaasunik najoqqutassiussaaq. Najoqqutassat taakku § 9 naapertorlugu naalackersuisut sinaakkutiliaannut naapertuutissapput, aamma tamanna pillugu oqaaseqaatit aamma takukkit.

Maleruagassat ilitsersuutaasut ullumikkut ukunani nassaassaapput "Pisortat suliffeqarfiutaasa toqqorsivii - Toqqortanik toqqortarinnineq, tunniussineq atorunnaarsitsinerlu pillugit aalajangersakkat ilitsersuutillu" Kalaallit Nunaata Allagaateqarfiata 1987-imi saqqummersitai aamma "Nunatsinni kommunini toqqortanik toqqortarinnineq atorunnaarsitsisarnerlu pillugit aalajangersakkat" 1991-imi Nunatta Katersugaasiviata Allagaateqarfialu saqqummersitaani.

§ 14

§ 14 Inatsisartut peqqussutaanni nr. 4, 18. maj 1990-imeersumi § 10-mut naapertuuppoq. Taamaattorli akuersissuteqartarneq pillugu malittarisassat sukaammineqarsimapput maannakkummi erseqqissumik ersermat akuersissut allaganngorneqassasoq.

Imm. 1

Nukissat pissutiginnarlugit maanna ersereerpoq pisortat suliffeqarfiutaasa toqqortaataasa ilaminiinnanngui pigiinnarneqarsinnaasut. Inuiaqatigiinni paasissutissiiiffiusartuni nutaaliaasuni paasissutissarpasuit pilersinneqartartut suliffeqarfinni pappiaqqat paasissutissallu ingerlaarnerat pitsaasumik aaqqissuunnerisigut aammalu paasissutissat pigiinnarnissaat pisariaqanngitsut aaqqissuussaasumik atortussaajunnaarsinneqartarnerisigut, soorlu nuutsitat pisariaqanngitsut, suliat assigiiaartut, paasissutissat nalinginnarmik suleriaatsinut paasissutissiiiniutaannaalluunniit il.il. peertarnerisigut atorneqarsinnaasunngorlugit paasiuminartunngorlugillu ilusilersorneqartariaqarput.

Oqartussatut ingerlatsiveqarfinni amerlanerni suliffeqarfiup iluani atortussaajunnaarsitsinerlut malittarisassaqqarpoq Nunatta Katersugaasiviata Allagaateqarfialu akuerisaanik. Taamaattoqarsimangippat atortussaajunnaarsitsineq allaganngorlugu akuersissuteqartoqarneratigut aatsaat pisinnaavoq. Nunatta Katersugaasiviata Allagaateqarfialu pisortaqqarfiup ilumini atortussaajunnaarsitsinerlut malittareqqusai akuerisimappagit tamanna aporfiussanngilaq atortussaajunnaarsitsinerup annertunerusup akuerineqarnissaanut.

Toqqortanik atortussaajunnaarsitsineq aamma Nunatta Katersugaasiviata Allagaateqarfialu maleruagassiai ilitsersuutaasut malillugit pisinnaavoq, tak. § 13 tassungalu oqaaseqaatit.

Tamakku saniatigut inatsisitigut allatigut toqqortanik atortussaajunnaarsitsineq pillugu immikkut malittarisassiorqarsinnaavoq. Malittarisassat taamaattut soorlu Nalunaarsuutit naalackersuisuni pisortat ingerlassaat pillugit inatsimmi nr. 294-imi §

9, imm. 3 allassimapput. Taamaalilluni pisortat oqartussa qarfiini qarasaasiatigut nalunaarsukkat inunnut tunngasortaqtut nalunaarsuiffinnut ataasiakkaanut nalunaarsuiffiit atortussaajunnaarsinneqarnerat pillugit immikkut aalajangersakkanik aalajangiisoqassaaq, tassa Nalunaarsuutit naalakkersuisuni pisortat ingerlassaat pillugit inatsimmi nr. 294-imi § 6, im. 2 naapertorlugu.

Imm. 2

Toqqortat atortussaajunnaarsitassatut aalajangikkat aserorterneqassapput. Nunatta Katersugaasivianut Allagaateqarfianut allanulluunniit tunniunneqarsinnaanngillat. Aserorterneq maskiinamik sequtserinikkut, ikuallaanikkut assigisaanilluunniit isumannaatsumik pisinnaavoq. Toqqortanik aserorterneq nakkutigineqartumik piuartariaqarpoq. Pisortat suliffeqarfiutaasa toqqortat kikkunnit susassaqqanngitsunik pissarsiarineqarsinnaajunnaarlugit aserorterneqarnissaata isumagineqarnissaat pisussaaffigaat.

Kapitali 4.

§ 15.

Imm. 1

Aalajangersagaq Inatsisartut peqqussutaanni nr. 4, 18. maj 1990-imeersumi § 11, imm. 1, oqaaseqatigiinnut siullernut. aappaannullu naapertuuppoq aammalu Nunatta Katersugaasiviata Allagaateqarfiatalu toqqortanik tigusisussaataitaneramik aammalu pisortat suliffeqarfiutaasa toqqortanik tunniussisussaataitanerannik imaqarpoq.

Toqqortanik ukiunik 15-inik pisoqaassusilinnik pisoqaanerusulluunniit tigusinissaminut Nunatta Katersugaasivia Allagaateqarfialu pisussaaffeqarpoq toqqortat allaffissornikkut oqartussa qarfimmu tunniussisusumut pingaaruteqarunnaaraangata atorunnaarsitsinissamullu killiliussaasinnaanut naagaangata. Takuuk § 14 atorunnaarsitsinermut tunngasoq kiisalu tamatumunnga oqaaseqaatit.

Pisoqaassusissaannut piumasaqaatit toqqortat ataatsimoortut ukiumi naaffianni naatsorsorlugit aallartinneqartarput. Toqqortat ataatsimoortut tassaapput pissutsimikkut ataatsimoortut, soorlu protokolit, allakkiat suliamut tunngasut, mikrofilmit, magnetbåndit imaluunniit suut ataatsimoortut toqqortaninermi ilanngunneqarsimasut. Assigiinngitsut pissutaallutik, assersuutigalugu nalunaarsuisarnerup akuttussusaa, imaassinnaavoq ukiut 15-it sinnerlugit qaangiutereersut aatsaat tunniussisoqartoq.

Allatut isumaqatigiissuteqartoqarsimangippat assigiinngitsut pissutigalugit Nunatta Katersugaasiviata Allagaateqarfiatalu piumasarinnaavaa tunniussinermi suliat, protokolit il.il. ataqatigiissut tunniunneqassasut tassami annikitsukkuutaarlugit

tunniussisarnerit tamatigut tulluanngivissumik aaqqissuineramik nassataqartarmat. Najoqqutassani ilitsersuutaasuni "Pisortat suliffeqarfiutaasa toqqorsivii - Toqqortanik toqqortarinnineq, tunniussineq atorunnaarsitsinerlu pillugit aalajangersakkat ilitsersuutillu" Kalaallit Nunaata Allagaateqarfiata 1987-imi saqqummersitaani immikkoortoq 4-imi kaammattuutigineqarpoq ukioq killiliussaq aalajangersimasoq tikillugu toqqortarineqartut tunniunneqartussaataasullu tamarmik tunniussinermi ilanngunneqassasut.

Toqqortat suli atorineqartut tunniunneqassanngillat. Tassa imaappoq suliata naammassineqarsimanngitsut tunniunneqarsinnaanngillat. Tunniussisussaataa-nermi aamma pineqanngillat toqqortat pisortat suliffeqarfiutaata ilisimatuussutsikkut katersaatai.

Inatsisit allat naapertorlugit immikkut tunniussinissamut killiliussanik aalajangersaasoqarsinnaavoq.

Imm. 2

Aalajangersagaq Inatsisartut peqqussutaanni nr. 4, 18. maj 1990-imeersumi § 11, imm. 1, oqaas. 3-imut naapertuuppoq. Imm. 2 pissutigalugu Nunatta Katersugaassiviata Allagaateqarfiatalu saniatigut allanut tunniussisoqassanngitsoq utaaqqissaannaanngitsumilluunniit naami. Taamaalilluni tassa immikkut kommunit toqqorsiviliortoqarsinnaanngilaq kommunit ingerlatsiviisa toqqortanik toqqortarinniffigisinnaasaannik ingerlatsiviup atorunnaagaanik. Taamaattorli oqartussa qarfiit ataasiakkat toqqorsivinnik pilersitsisinnaapput sulianut oqartussa qarfiup suliaanut pingaaruteqarunnaartunut atugassammik tunniussinissap tungaanut toqqorsivissamik, aamma takukkit § 7, imm. 1-imut oqaaseqaat. Toqqorsiviliornermi suliassanik sularinnittarneq pillugu inatsit kikkulluunniillu suliannik pissarsisinnaatitaanerit pillugu inatsit naapertorlugit innuttaasut suliannik pissarsisinnaanerisa ajornarnerulinnginnissaat eqqarsaatigineqassapput.

Imm. 3

Aalajangersagaq Inatsisartut peqqussutaanni nr. 4, 18. maj 1990-imeersumi § 11, imm. 3-imut naapertuuppoq. Toqqortanik ukiunit 15-init pisoqaanerusunik tigusinissaminik Nunatta Katersugaasiviata Allagaateqarfiatalu imm. 1 naapertorlugu pissusaaffeqarnerata atuutsinnginneqarsinnaanerit taamaallaat aalajangersagaq tunngavoq.

Pisortat suliffeqarfiutaat suliassa qarfimmik suliffeqarfimmit allanit atorunnaartumit tigusigaa-ngami, taamalu toqqortaataanik tigusigaangami, toqqortat taakku pisortat suliffeqarfiutaata nammineq toqqortaataanit § 7, imm. 2 naapertorlugu immikkoortinneqassapput. Toqqortat tiguneqarsinnaasut tassaapput suliata naammassineqarsimanngitsut aammalu suliata suliffeqarfimmut suliassa qarfimmik tigusisuusumut allaffissornikkut pingaaruteqarsinnaasut. Pisortat suliffeqarfiutaasa pioreersut akornini akisussaaffiit allannornerat pillugu aamma takuuk § 8-mut oqaaseqaatit.

§ 16

Imm. 1

Aalajangersagaq imm. 2 peqatigalugu Inatsisartut peqqussutaanni nr. 4, 18. maj 1990-imeersumi § 11, imm. 4, oqaas. 1-inut naapertuuppoq, taanna naapertorlugu toqqortat tunniunneqartussat aaqqissuunneqassapput, nalunaaqutserneqarlutik, poortorneqarlutik aammalu qulequtalersorneqarlutik Nunatta Katersugaasiviata Allagaateqarfiatalu malittarisassiai malillugit. Taamaattorli maanna erseqqissumik erseqqissarneqarpoq tunniussisoqannginnerani suliat salinneqassasut.

Sulianik saliineq paasineqassaaq suliat ataasiakkaat misissorneqarnerattut, taamaaliornermi nuutat, paasissutissat amerlasuunngukkat sinneri, atuakkat, ungalut plastikkitt allallu suliamut attuumassuteqanngitsut peerneqassasut. Aamma saviminerit kakkersaatit tasisuasullu gummit peerneqassapput manngertorninermikkut nungujartornermikkullu toqqortanik ajoqusiisinnaammata. § 14, imm. 2-imut oqaaseqaatit malitsigereerpaat toqqortat atorunnaarsitassanngorsimasut tunniunneqarsinnaanngitsut.

§ 16 toqqortanut pisortat suliffeqarfiutaata suliffeqarfimmit atortussaajunnaarsinneqarsimasumit tigusimasaanut § 15, imm. 3 naapertorlugu atuutinngilaq. Taamaattut tigusinermi pissusiattut tunniunneqarsinnaapput.

Imm. 2

Najoqqutassiat ilitersuutaasut quppersakkami "Pisortat suliffeqarfiutaasa toqqorsivii - Toqqortanik toqqortarinneq, tunniussineq atorunnaarsitsinerlu pillugit aalajangersakkat ilitersuutillu" Kalaallit Nunaata Allagaateqarfiata 1987-imi saqqummersissimasaani maanna nassaassaapput. Taakku ilaatigut immikkoortumi 2-imi ima qarput toqqortanut illerfiusat, allattuiffiit, nalunaaqutsersuutaasa inissinneqarfissaat aammalu nipinnequtip atorneqarnissaa pillugit piumasaqaatinut aalajangersakkanik aammalu immikkoortoq 3-imi aaqqissuussinissaq tunniussinermilu qulequtsersuinissaq pillugu aamma ima qarlungi.

Imm. 3

Aalajangersagaq Inatsisartut peqqussutaanni nr. 4, 18. maj 1990-imeersumi § 11, imm. 4, oqaas. 2-inut naapertuuppoq. Tunniussinermi angallassinermut aningaasartuutit saniatigut aningaasartuutit tassaapput toqqortanut illerfiusanik allanillu poortuinermit nalunaaqutsersuinermullu atugassanik pisinerit. Oqartussa qarfiup tunniussisuusup sulianik saliisussaataitanini ingerlaavartumillu atorunnaarsitsisartaataitanini naammassisimangippagit aaqqinneqarnissaasa tungaanut Nunatta Katersugaasiviata Allagaateqarfiatalu toqqortanik tigusiumannginnissaminut taarsiullugu suliarinissaannut naleqquttumik akileeqqusisinnaavoq.

Toqqortat tunniunneqareerneranni aningaasartuutit Nunatta Katersugaasiviata Allagaateqarfiatalu isumagissavai. Tamanna Nunatta Katersugaasiviata Allagaateqarfiatalu § 15-imi aalajangersakkat naapertorlugit toqqortanik tiguisusstaatitaanerata toqqortarinnittussaatitaaneratalu malitsigaa.

§ 17

Aalajangersagaq Inatsisartut peqqussutaanni nr. 4, 18. maj 1990-imeersumi § 11, imm. 5-imut naapertuuppoq. Suli naatsorsuutigineqarpoq taamaallaat toqqortat suliffeqarfiup nammineq tunniussai sulinermut atugassanngorlugit attartorneqarsinnaasut.

Suliat sulinermut atugassanngorlugit attartortariaqalersinnaapput suliassat sularineqartarnerat pillugu inatsit aamma kikkulluunniit sultanik malinnaasinnaatitaanerata pillugu inatsit naapertorlugu suliap allagartaanik misissuinissamut qinnuteqaatit sularineqarneranni. Taama pisoqarsinnaavoq kap. 5-imi aalajangersakkat naapertorlugit toqqortat suli tamanit takuneqarsinnaanngunnginneranni.

Pissarsiarineqarsinnaanerannut piffissarititaasup naareernerani suliap allagartaanik misissuinissamut qinnuteqartoqarunnangilaq tassami toqqorsiveqarneq pillugu inatsimmi malittarisassat naapertorlugit toqqortanik atuinissamut periarfissat nalinginnaasumik annertunerussaqqimmata suliap allagartaanik misissuisinnaatitaanermingarnit, tak. kapitali 5-imut oqaaseqaatit.

Kapitali 5.

Suliassat sularineqartarnerat pillugu inatsit aamma paasitinneqarsinnaatitaanerlu pillugu inatsit naapertorlugu suliap malinnaasinnaatitaaneq toqqortat Nunatta Katersugaasivianut Allagaateqarfianullu tunniunneqarsimanerannit sunnerneqarnavianngilaq, tak. § 17-imut oqaaseqaatit. Toqqorsiveqarneq pillugu inatsit naapertorlugu toqqortat kikkunnilluunniit pissarsiarineqarsinnaalernissaat tikillugu toqqorsiveqarneq pillugu inatsimmi toqqortat atorneqarsinnaanerata pillugu aalajangersakkat suliat allagartaanik pissarsisinnaatitaaneq pillugu malittarisassanit salliussapput.

Allagaateqarfeqarneq pillugu inatsit naapertorlugu toqqortat kikkunnilluunniit takuneqarsinnaalerniartullu toqqortat atorneqarsinnaanerannut periarfissat suliap allagartaanik pissarsisinnaanermi annertunerulissapput. Suliat allagartaanik misissuinissamut qinnuteqarnerup akertianik toqqortanik atuinermi atuerusuttup uppersaatit sultanilluunniit sordernik atuinissaminik taasaqarnissaa Inatsisartut inatsisaat manna malillugu piumasarineqanngilaq. Assersuutigalugu oqaluttuarisaanermik misissuinermi aallaavigineqartarpoq sammisamut paasisaqarfigerusunneqartumut tunngasortalinnik toqqortaateqartoqarnerisooq paasiniassallugu.

Toqqortat atorneqarsinnaanerannut toqqortat qanoq pisoqaatigilersimanerat apeqqutaavoq, tak. §§ 18-20. Aalajangersakkatigut tamakkunuuna kikkulluunniit pissarsisinnaanerannik killiliisutigut siunertarineqarpoq pisortat inuilluunniit ataasiakkaat soqutigisaat innimiilliorfigineqannginnissaat, tassani pineqarput isertuuttariaqakkatut naatsorsuutigineqartariaqartut. Tamatumunnga atatillugu inuit ataasiakkaat paasissutissanik inniminartunik, ajoqutaasinnaasunillu namminnerminnut tunngasunik sivisuumik isertuussisinnaatitaasutut isigineqarput.

Pissarsiarineqarsinnaalerfissaannut killiuliussaq § 18 naapertorlugu nalinginnaasoq tassaavoq ukiut 25-it. Tamatumunnga immikkut iliuuseqarsinnaanerit §§ 19-20-imi taaneqarput. Inatsit allat tunngavigalugit allatut aamma iliuuseqartoqarsinnaavoq. Toqqortanik pissarsiniartoqarnerani Nunatta Katersugaasiviata Allagaateqarfiatalu toqqortat pissarsiarineqartinnagit paaseqqaartariaqarpaa toqqortat pineqartut tamanit pissarsiarineqarsinnaatitaanersut. Erseqqissarneqassaaq toqqortat tamanit pissarsiarineqarsinnaasut kikkunnilluunniit pissarsiarineqarsinnaammata. Taamaalilluni tassa toqqortanik pissarsiniartut immikkut piumasqaateqarfigineqarsinnaanngillat.

§ 18

§ 18 imarisamigut Inatsisartut peqqussutaanni nr. 4, 18. maj 1990-imeersumi § 14, imm. 1-imut naapertuuppoq, tassanilu aalajangerneqarpoq pissarsiarineqarsinnaalerfissaat ukiunut 25-inut killilerneqartoq. Tassa nalinginnaasumik tunniunneqarneriniit ukiut qulit ingerlaqqaassapput toqqortat tamanit pissarsiarineqarsinnaalernissaasa tungaannut. Nunatta Katersugaasiviata Allagaateqarfiatalu mianerisariaqarpaa toqqorsivinni tamanit tikinneqarsinnaasuni toqqortat tamanit pissarsiarineqarsinnaasut pissarsiarineqarsinnaanngitsullu immikkoortinneqarnissaat.

§ 19-imi aalajangersagaq apeqqutaatinnagu ukiunik 25-inik malittarisassaq atuutissaaq paasissutissanut inunntut tunngasunut paasissutissat taakku ajoqutaasussaannngikkaangata tassaannaallutilli isertuussassat nalinginnaasut soorlu inuttut inissisimassusermut tunngasut, soorlu nuliaqarneq/ueqarneq il. il. Ukiut 25-it sinnerlugit illersortariaqarnissaannik tunngavissarissaartumik pisariaqartitsisoriaqariataassagaluarpat § 20, imm. 1-imik tunngaveqarluni pissarsiarineqarsinnaalernissaat pillugu immikkut ittumik isumaqatigiissuteqartoqarsinnaavoq, tamatumunnga oqaaseqaatit takukkit.

Pissarsiarineqarsinnaalernissaannut killiuliussaq naappat toqqortat kikkunnilluunniit pissarsiarineqarsinnaalissapput.

§ 19

Aalajangersagaq Inatsisartut peqqussutaanni nr. 4, 18. maj 1990-imeersumi § 14, imm. 2-mut naapertuuppoq.

Aalajangersakkakut paasissutissat inuttummuinnavik tunngassuteqartut ajoqutaasinnaasut illersorneqarput. Tassaapput peqqissutsimut, inuttut aningaasaqarnikkullu ajornartorsiutit annertuut kiisalu nuannaarniutunik atonerluinerit. Akerlianik ukiunik 80-inik killiliussaq paasissutissanut ajoqutaasussaannngitsunut nalinginnaasumik isertuussassanut, soorlu inuttut inissisimassusermut, tassa nuliaqarnermut/ueqarnermut tunngasunut atuutissanngilaq. Ukiut 80-it sinnerlugit illersuisoqarnissaannik tunngavilersorluakkamik pisariaqartitsisoqariataassagaluarpat pissarsiarineqarsinnaanerannut killiliussat immikkut ittut § 20, imm. 1 tunngavigalugu isumaqatigiissutigineqarsinnaapput.

Toqqortat ukiunik 80-inik killiliussamut ilaasut assersuutitut taaneqarsinnaasut tassaapput suliat sulisoqarnermut tunngasut, inunnik isumaginninnikkut sullitat, qitornavissiarthaarniarneq pillugu suliat, atuarfiit tarnikkut ilisimasalittaasa nalunaarusiaat kiisalu nammineerluni nalunaarsukkat aammalu akileraartarnermut tunngasut. Ukiunik 80-inik killeqartitsinerup atorneqarnissaa pissutsit ataasiakkaat aallaavigalugit Nunatta Katersugaasiviata Allagaateqarfiatalu aalajangiivigissavaa, pisariaqassappat suliffeqarfik toqqortalik isumasioqatigalugu.

§ 20

Imm. 1

Aalajangersagaq Inatsisartut peqqussutaanni nr. 4, 18. maj 1990-imeersumi § 14, imm. 3-imik itisilerineruvoq erseqqissaanerullunilu.

§ 20-ip nassuiarneqarnerani pingaartinneqassaaq §§ 18-19-imi pissarsiarineqarsinnaassusiannut killiliussaq sivitsorneqassammat aalajangersakkami taaneqartut soqutigisaasa immikkut eqqarsaatigisariaqarnerata illersorneqarnissaatut annertutigisumik aatsaat pisinnaammat. Soqutigisat taakku suliassanik suliarinnittarneq pillugu inatsit aammalu kikkulluunniit pissarsisinnaassusiat pillugu inatsit naapertorlugu suliap pappialartaanik pissarsisinnaanermi allakkatigut uppersarsaatit ilaasa ilanngutitsinngitsoortitsisinnaasut taamaaqatigaat. Tassani naatsorsuutigineqarpoq § 20-imi illersuisariaqarneq toqqortanik pissarsisinnaanermut tunngasoq suliassanik suliarinnittarneq pillugu inatsit aammalu kikkulluunniit pissarsisinnaassusiat pillugu inatsit naapertorlugu suliat allagartaanik pissarsisinnaanermut apeqqummit pingaartinneqannginnerussasoq, tamanna pissuteqarpoq toqqortat tamanit takuneqarsinnaalernissaasa tungaanut piffissap ingerlanissaa - tassa ukiut 25-it ukiullu 80-it. § 19-imi takuneqarsinnaalernissaanut killiliussap sivitsorneqartarnissaat qaqutiguussaquisutut naatsorsuutigineqarpoq.

Inuit ataasiakkaat sullissiveqarfiillu soqutigisaasa annertuumik eqqarsaatigisariaqarnerat pissarsiarineqarsinnaalernissaannut killiliussamik sivitsuinermut pissutaasinnaasoq soorlu tassaasinnaavoq naalagaaffiup isumannaatsuunissaa illersorneqarnissaalu, naalagaaffiup nunanut allanut politikkikkut aammalu nunani allani aningaasaqarnikkut soqutigisaat, pisortat inuillu aningaasaqarnikkut soqutigisaat, tassunga ilanngullugit atortorissaarutitigut

periutsitigullu aaqqissuussinerit pillugit paasissutissat illersorneqarnissaat, pisortat nakkutilliinerat, pilersaarusiornermut malittarisassaqaartitsinermullu tunngasut kiisalu akileraartarnikkut akitsuusiisarnikkullu inatsisit naapertorlugit iliuutsit aammalu allaffigisaqattaannerit eqqartuussivinni atugassat imaluunniit eqqartuussisoqarnissaanik aalajangerniarnermi eqqarsaatersuutit.

Inuit ataasiakkaat toqqortaataannik tunniussaqaqtut pissarsiarineqarsinnaanerat pillugu qanorluunniit killiisinnaapput allaallu pissarsiarineqarsinnaanngilluinnarnissaanik aalajangiisnaallutik, tak. § 28, imm. 2.

Imm. 2

Aalajangersagaq nutaajuvoq Inatsisartullu peqqussutaanni nr. 4, 18. maj 1990-imeersumilu § 14, imm. 3-imut oqaaseqaataasimasutigut ersersinneqartunut sanilliullugu allanngortitsinerulluni tassami killiliussap sivisunerunissaannik aalajangiineq tunniussinermi imaluunniit kingusinnerusukkut pisinnaanngormat.

Aalajangersagaq aalajangersarneqarsimavoq pisortat suliffeqarfiutaasa toqqortaminnik piffissami sivisunerusumi pissarsisoqarsinnaajunnaarsillugu isumaqatigiissuteqarnissaat pinngitsoorniarlugu taamaaliornikkullu pisortat toqqortaataasa sapinngisamik ammanerpaajunissaannik naatsorsuutigineqartoq eqqortikkumallugu.

§ 21

Aalajangersagaq nutaajuvoq erseqqissaanerullunilu tunngaviit nalinginnaasut suut malitsigineeraat. Matumani eqqarsaatigineqarput isumaqatigiissutit § 3-imi aalajangersakkanik tunngaveqarluni siunissami isumaqatigiissutigineqarsinnaajumaartut. Aamma takukkit § 3-imut oqaaseqaatit.

Toqqortat Nunatta Katersugaasiviani Allagaateqarfianilu toqqortaatigineqartut naalagaaffiup Kalaallit Nunaanni suliffeqarfiutaaneersut pillugit naalakkersuisut naalagaaffimmilu oqartussat isumaqatigiissutaat naapertorlugit Nunatta Katersugaasiviani Allagaateqarfianilu toqqortaatigineqartut tamanit pissarsiarineqarsinnaanngillat.

§ 22

Pissarsiarineqarsinnaassusiannut killiliussaq toqqortat ataatsimoortut ukiumi naaffianniit naatsorsorneqassaaq. Tassa imaappoq, soorlu suliat 1995-imi naammassisut § 18-imit ilanngullugit pineqarsimagunik ukioq 2020-imi pissarsiarineqarsinnaalissapput 1995-ip qanoq ilineratigut naammassineqarsimanersut apeqqutaatinnagu.

§ 23

Imm. 1

§ 23, imm. 1 Inatsisartut peqqussutaanni nr. 4, 18. maj 1990-imeersumi § 14, imm. 6, oqaas. 1-inut naapertuuppoq. Immikkulli akuersissuteqarfiginninissamut periarfissat annertusineqarput malittarisassat nalinginnaasut saniatigut pissarsiarineqarsinnaassusiannut killiliussanut isumaqatigiissutigineqarsimasunut atuuttussanngorlugu, tassa naatsorsuutigalugu oqartussaqaarfik tunniussisuusoq tamatumunnga akuersissuteqarsimasoq, tak. imm. 2.

Ilisimatusarneq oqaluttuarisaanermik sammisaqarnerinnarmut tunngasussatut eqqarsaatigineqanngilaq aammali sammisanut allanut oqaluttuarisaanermi paasissutissanik tunngaveqarfiusartunut. Akerlianilli pissarsiarineqarsinnaassusiannut killiliussani immikkut akuersissuteqartoqassappat piumasarineqarpoq ilisimatusarneq paasiniaanerluunniit ilisimatuussutsimik tunngaveqassasoq. Toqqorsivinnik atuisarnerup ilarujussua tusagassiorlut sulinerannut inuilluunniit ataasiakkaat eqqarleriinnik najukkaminnulluunniit ilisimatusarnerannut tunngassuteqartarpoq. Taama "ilisimatusarnermut" atatillugu pissarsiarineqarsinnaassusiannut killiliussat immikkut akuersissuteqarnikkut atortussaajunnaarsinneqarsinnaassanngillat.

Naatsorsuutigineqarpoq Nunatta Katersugaasiviata Allagaateqarfiatalu immikkut akuersissuteqarsinnaanini mianersorluni atussagaa aatsaallu tunngavissaqarluartumik ilisimatusartoqarnerani atortassalluni. Tassa Nunatta Katersugaasiviata Allagaateqarfiatalu paasissutissat takorusunneqartut naliliivigisassavai takujumaneqarnerinilu siunertaasoq aamma. Pisortat toqqortaataasa ajornanninnerpaamik pissarsiarineqarsinnaanissaannik kissaat, aammali imm. 3 naapertorlugu immikkut akuersissuteqarfigineqarnissamut piumasaaqateqarnissamut periarfissat immikkut akuersissuteqarnissamut suliat suliarineqartillugit eqqarsaatigineqassapput.

Imm. 2

Imm. 2-mi aalajangersagaq nutaajuvoq immikkullu akuersissuteqarfigineqarnissamut periarfissat annertusineqarnerata imm. 1-ip malitsigisaata kinguneralugu.

Ilisimatusarnermut atorneqartussaataillugit pissarsiarineqarsinnaassusiannut killiliussat immikkut akuersissuteqarnikkut atortinneqannginnissaannik oqartussat tunniussisuusut akuersissuteqarsinnaanerannut, immaqa piumasaaqatitalerlugu, aalajangersagaq aporfissaqartitsinngilaq.

Imm. 3

Imm. 3 Inatsisartut peqqussutaanni nr. 4, 18. maj 1990-imeersumi § 14, imm. 6, oqaas. 2-nut naapertuuppoq.

Paasissutissat pissarsiarineqarsinnaasutut akuerineqartut qanoq ittuunersut tunngavigalugit piomasagaatit aalajangiunneqassapput. Nunatta Katersugaasiviata Allagaateqarfialu soorlu aalajangersinnaavoq toqqortat immikkut akuersissuteqartoqarneratigut pissarsiarineqarsinnaalersinneqartut misissussallugit paasissutissallu ajoqutaasinnaasut piiassallugit, imaluunniit paasissutissat ajoqutaasinnaasut tamanut saqqummiunneqarnissaat ingerlateqqinneqarnissaalluunniit inerteqqutigisinnaallugu.

Immikkut akuersissuteqarfigineqarsimasup inuit eqqissisimanerlinik ataqqinninnissaminik allakkatigut imminut pisussaaffilernissaa piomasagaataangilaq, kisianni tamatigut § 25-imi paasissutissat misikkarissut atornerlunneqarnerannut akisussaaffimmut tunngasunik ilisimatinneqartariaqarput.

§ 24

Imm. 1

Aalajangersakkap immikkoortuata aappaa - ilitsersuisussaataitaneq - Inatsisartut peqqussutaanni nr. 4, 18. maj 1990-imeersumi § 15, imm. 1-imut naapertuuppoq. Nutaartatullu erseqqissumik aalajangiunneqarpoq toqqortat nalinginnaasumik taamaallaat Nunatta Katersugaasiviani Allagaateqarfianilu atorineqarsinnaammata. Taamalisoaqannginnissaanut imm. 2-mi aalajangersagaqarpoq.

Ilitsersuineq tassaasinnaavoq suliat allakkalluunniit aalajangersimasut nassaariniarneranni ikiuunneq, imaluunniit toqqorsiviit paasissutissarsiorfigalugit, qanoq atorineqarsinnaanersut, eqqarleriinnik ilisimatusarnermi ikiuunneq, qarasaasiatigut paasissutissat saqqummersinneqarneranni il.il.

Imm. 2

Aalajangersagaq Inatsisartut peqqussutaanni nr. 4, 18. maj 1990-imeersumi § 15, imm. 2, oqaaseqatigiit aappaannut naapertuuppoq. Angerlaassineq taamaallaat ilisimatusarnermi pisinnaavoq. Ilisimatusarnerit suussusaat § 23-imi immikkut akuersissuteqartarnek pillugu aalajangersakkanisut killilerneqassapput. Taamalu tassa ilisimatusarnek oqaluttuarisaanikkut ilisimatusarnerinnarmut sammitinneqanngilaq.

Nunatta Katersugaasivia Allagaateqarfialu toqqortanik angerlaallugit attartortitsinissaminut pisussaaffeqanngilaq, naleqquttumilli ikiuuttariaqarluni. Nunatta Katersugaasiviata Allagaateqarfialu suliasaqarfii sulisussaqaarnerlu eqqarsaatigalugit naatsorsuutigineqartariaqartutut isigineqarpoq annillugit attartorneq taamaallaat pisinnaasoq attartorniakkat amerlassusaat killeqarpata aammalu sulikulunnarpallaanngitsumik nassaarineqarsinnaappata.

Sullissimeqarfiit ilinniarfiillu toqqortanik atugassaannik attartortinneqarsinnaasut soorlu tassaasinnaapput ilinniarneruut atuarfii universititit aammalu ilinniarfiit

qaffasinnerusut allat. Akerlianik aalajangersakkap kingunerisaanik inunnut ataasiakkaanut attartortitsisoqarsinnaangilaq.

Pisortat suliffeqarfiutaat toqqortanik namminneq tunniussaminnik § 17 naapertorlugu angerlaallugit attartortuaannarsinnaapput. Angerlaallugit attartorneq taamaallaat pisinnaavoq sulinermut atugassaritillugit aammalu allamut attartorteqqitassaritinnagit.

Aalajangersagaq allassimaffinnut nuutaangitsut taamaallaat atuuppoq taamaalu paasissutissat tamanit pissarsiarineqarsinnaasut nuullugit kikkunnilluunniit sumiluunniit atugassanngorlugit nassiunneqarnissaannut aporfissaqanngilaq. Tamatuminnga kissaateqartoqarpat Nunatta Katersugaasivia Allagaateqarfialu ikiuuttariaqarpoq killissaa mianeralugu. Nuutanik pissarserusuttup paasissutissat sorliit piniarnerlugit eqqorluakannerlugu taasariaqarpai. Taamaattoqanngippat Nunatta Katersugaasiviata Allagaateqarfialu innersuussutigisinnaavaa atugassat Nunatta Katersugaasiviani Allagaateqarfianilu atornerqartariaqassasut.

§ 25

Aalajangersagaq Inatsisartut peqqussutaannut nr. 4 maajip 18-iani 1990-iminngaanneersumut naleqqiullugu nutaajuvoq, tassami nipangiussisussaataaneq pillugu aalajangersagaq naliginnaasumik toqqortaatinik immikkut akuersissuteqarluni alakkaanermi, siornatigutuunngitsoq, immikkut akuerisaanissamut piumasaqaatigineqarluni.

Aalajangersakkakkut siunertarineqarpoq toqqortat tamanit pissarsiarineqarsinnaangitsut pissarsiariniarlugit qinnuteqaatit allaffissornikkut aqunneqarnerisa pisariillisarneqarnissaat, aammali paasissutissat isertuussassat toqqortani kikkunnit tamanit pissarsiarineqarsinnaasuni nassaassaariataarsinnaasut atornerlunneqannginnissaat § 23 malillugu toqqortaatinik alakkaanermiu qularnaarniarlugu.

Paasissutissat isertuuttarialiusarput inatsisitigut allatigulluunniit aalajangersakkatigut atuuttutigut taamaattutut oqaatigineqaraanngamik, imaluunniit pisortat inuilluunniit ataasiakkaat soqutigisaat pissutigalugit isertuunnissaat pisariaqaraanngat.

Ingerlatitseqqinneq, tamanut saqqummiussineq atuinerlu taamaaliortussaataatinnani pisassan-ngillat. Tassa tamanna ima paasineqassaaq paasissutissat soorunami atornerqarsinnaasut paasissutissat tamanut saqqummiunneqartut ilaattut taamaaliornikkut inuit ataasiakkaat ataqqisariaqassusiat innarlerneqanngippat imaaluunniit soqutigisat illersortarissat allat innarlerneqanngippata. Soorlu assersuutigalugu, inuttai kikkunersut paasineqarsinnaasariaqanngillat.

§ 26

Aalajangersagaq Inatsisartut peqqussutaannut nr. 4, 18. maj 1990-imeersumut sanilliullugu nutaajuvoq kisianni ulloq manna tikillugu Nunatta Katersugaasiviata Allagaateqarfiatalu suleriaasianut naapertuulluni.

Imm. 1

Atuiniartoqarnera aatsaat itigartitsissutigineqarsinnaavoq toqqortat ima innarlarsimagitippata nalinginnaasumik atorneqarnissartik attassinnaanagu.

Imm. 2

Toqqortat ataatsimoortut innarleqqinnerunagit pisinnaappat Nunatta Katersugaasiviata Allagaateqarfiatalu assilillugit nuussineq taamaaliortoqarneratigullu atorneqarsinnaalersinneqarnissaat itigartitsissutigisinnaangilaa.

§ 27

Tunngaviuvoq ilisimatusarnerup tamanullu atugassiisarnerup akeqanngitsumik kiffartuussinertut isumagineqartarnissaa. Taamaakkaluartoq aalajangersakkami periarfissiisoqarpoq sulianut annertunerusunut aamma sulisoqarnikkut aningaasaqarnikkullu atuiffiunerusussanut akiliuteqartoqarnissaanik piumasqaartoqarsinnaanissaa. Assersuutitut taaneqarsinnaapput allagaatigisat nuutinneqarnissaannut akiliisitsisoqartarsinnaanera, kiisalu sulisut piffissaajaatigisaannik ikiorsiisoqarsinnaanera, assersuutigalugu allaggaatinik aalajangersimasunik ujaasisoqartariaqartillugu.

Kapitali 6.

Kapitali taanna Inatsisartut peqqussutaanni nr. 4, 18. maj 1990-imeersumi kapitalimut assingusumut sanilliullugu aallaalaarpoq. Tamatumunnga pissutaasoq pingaarneq tassaavoq Toqqorsiveqarneq pillugu Inatsisartut inatsisissaattut siunnersuutikkut matumuuna siunertarinqarmat pisortat suliffeqarfiutaasa toqqorterisarnerat aammalu Nunatta Katersugaasiviata Allagaateqarfiatalu toqqorsiveqarneq pillugu akisussaaffii pillugit malittarisassaqaqtitsinissaa.

Katersugaaviit akuerisaasut, tak. matumunnga peqatigitillugu saqqummiunneqartoq Katersugaasiveqarneq pillugu Inatsisartut peqqussutissaattut siunnersuut, toqqorsiveqarnikkut inissisimanerisa allangortinneqarnissaat siunertarinqanngilaq. Katersugaasiviit taakku inatsimmi taaneqanngillat inatsit taanna malillugu tamakkuninnga suliaqarnissaminnik pisussaaffiligaanngimmata.

Kikkulluunniit namminneq toqqorsiviliorsinnaapput. Nammineq toqqorsivittut paasineqassapput toqqorsiviit inunnit ataasiakkaanit suliffeqarfinnilluunniit il.il. § 2, imm. 1-2-imi taaneqanngitsut pilersissimassaat. Nunatta Katersugaasivia

Allagaateqarfialu toqqortat taamaattut qanoq tunniunneqarnissaat pillugu sunniuteqarsinnaanngilaq. Toqqortat taamaattut toqqortarinnineq, atortussaajunnaarsitsineq, tunniussineq il.il. pillugit inatsimmi aalajangersakkanit pineqanngillat, tunniussisullu aalajangigai qaqugukkulluunniit ataqqineqassapput.

Inuit ataasiakkaat toqqortaataat tunissutigineqarnerisigut, pisiarinerisigut kingornunneqarnerisigulluunniit pissarsiarineqarsinnaapput. Inuit ataasiakkaat toqqortaataasa Nunatta Katersugaasiviani Allagaateqarfianilu toqqortarineqarnissaat pillugu isumaqatigiissuteqartoqarnissaanut aporfissaqanngilaq aammalu isumaqatigiissutinut tamakkununga atasunik toqqortarinnineq, pissarsiarineqarsinnaassusiat utertinneqarnissaallu pillugit piunasaqaasiortoqarsinnaaneranut aporfissaqarani.

Inuit ataasiakkaat toqqortaataat Katersugaasiveqarneq pillugu Inatsisartut peqqussutaanni aamma pineqassapput taamaammallu toqqortat piorsarsimassutsikkut eriagisarissat pillugit aalajangersakkatut Inatsisartut peqqussutaanni nr. 4, 18. maj 1990-imiittutut ittunik aalajangersagaliortoqarnissaa pissutissaqarsorineqanngilaq. Taamaattorli toqqortat nunamit anninneqartussat Nunatta Katersugaasivianit Allagaateqarfianillu assilineqarnissaannut periarfissiisoqarpoq taakku ilisimatusarnikkut nalinginnaasumilluunniit piorsarsimassutsikkut pingaaruteqarpata, takukkit § 29-imut oqaaseqaatit.

§ 28

Imm. 1

Aalajangersagaq Inatsisartut peqqussutaanni nr. 4, 18. maj 1990-imeersumi § 13, imm. 2-mut naapertuuppoq inatsisip Nunatta Katersugaasivianut Allagaateqarfianullu toqqorsiveqarnikkut akissussaaffiunut taamaallaat atuunnerata kingunerisai allannguutitalugit.

Inuit ataasiakkaat toqqortaataat tunniunneqarnerini piunasaqaatigineqartut naapertorlugit suliarineqartassapput. Tamatumunnga ilanngullugu isumaqatigiissutigineqarsinnaavoq toqqortat toqqortarineqassat kingornalu utertinneqarlutik, aamma tamanit pissarsiarineqarsinnaalernissaannut immikkut killissarititaasinnaasut pillugit aalajangersaasoqarsinnaanera isumaqatigiissutigineqarsinnaapput.

Nunatta Katersugaasivia Allagaateqarfialu inuit ataasiakkaat toqqortaataannik tigusiumannngissinnaanngilaq ilisimatusarnikkut nalinginnaasumillu Kalaallit Nunaata piorsarsimassutsikkut inuiaqatigiitsigullu ineriartornermut paasissutaasussatut pingaaruteqartunik. Inuit ataasiakkaat toqqortaataat kap. 3-imi 4-imilu aalajangersakkanit pineqanngillat, taamalu qaqugukkulluunniit qanorluunniillu illutik tunniunneqarsinnaallutik.

Imm. 2 aamma 3

Inuit ataasiakkaat toqqortaataasa tunniunneqarnerminni qanoq suliarineqarnissaannik aalaja-ngersaavigineqarsimatinnagit malittarisassat sorliit malillugit qanoq suliarineqassanersut aalajangersakkatigut taakkunuuna aalajangerneqarpoq. Taama pisoqaraangat pisortat sullissiveqarfiisa toqqortaataasa pissarsiarineqarsinnaaner atorneqarnerallu pillugit malittarisassat atorneqassapput.

§ 29

Aalajangersagaq nutaajuvoq Inatsisartullu peqqussutaanni nr. 4, 18. maj 1990-imeersumi kap. 8-imi piorsarsimassutsikkut eriagisassat pigiinnarneqarnissaat pillugu aalajangersakkat atuutiinnarneqannginnerisa kinguneratut isigisariaqarluni.

Inuit ataasiakkaat toqqortaataat ilisimatusarnermi nalinginnaasumilluunniit piorsarsimassutsikkut pingaaruteqartut nunamit anninneqartussaatiillugit taakku assilinnissaannut Nunatta Katersugaasivia Allagaateqarfialu periarfissinneqassaaq. Inuit ataasiakkaat toqqortaataasa pingaaruteqarnersut Nunatta Katersugaasiviata Allagaateqarfialu aalajangissavaa. Nammineq pigisanik toqqortaateqartoq taakkuninngalu nunamit annississamaartoq Nunatta Katersugaasivianut Allagaateqarfianullu attaveqassaaq, taassumalu assileneqassanersut assileneqassannginnersulluunniit isummerfigissavai.

Kapitali 7.

§ 30

Tunniussisussaataitanermik aalajangersakkanik unioqqutitsinerit pineqaatissiissutaasinnaanerat nutaartaavoq. Pineqaatissiinerit pillugit aalajangersakkat Inatsisartut peqqussutaanni nr. 4, 18. maj 1990-imeersumi § 28-imi naammattuugassaapput taamaallaallu peqqussummi tassani kapitali 8.-imi piorsarsimassutsikkut eriagisassat illersorneqarnissaat pillugu aalajangersakkanut tunngallutik. Kapitali taanna inatsimmi matumani § 29-imit taarserneqarpoq aalajangersakkamillu taassuminga unioqqutitsineq akiliisitsissutaasinnaavoq.

Kapitali 8.

§ 31.

Imm. 2

Aalajangersakkakut Inatsisartut peqqussutaanni nr. 4, 18. maj 1990-imeersumi aalajangersakkat atortussaajunnaarsinneqarput toqqorsiveqarnermut tunngasut tassaasut:

§ 1, imm. 1, oqaas. 2, § 3, imm. 1, nr. 3, § 5, imm. 2, §§ 7-15, § 18 aamma § 26 kiisalu §§ 19-20, § 23, imm. 2, nr.5 aamma § 28-imi toqqorsiveqarnermut tunngasut.

§ 32

Ullumikkut tamatumunnga tunngasumik nalunaaruteqanngilaq.

Allaffissornikkut tamatumani maleruaqqusat suli atuuttut tassapput Kultureqarnermut, Ilinniartitaanermut Ilageeqarnermullu Pisortaqarfiup kommunit ingerlatsiviini toqqortat atortussaajunnaarsinneqartarnerat pillugu kaajallaasitaa nr. 3, 1987-imeersoq, kiisalu maleruagassat ilitsersuutaasut "Pisortat suliffeqarfiutaasa toqqorsivii - Toqqortanik toqqortarinnineq, tunniussineq atorunnaarsitsinerlu pillugit aalajangersakkat ilitsersuutillu" Kalaallit Nunaata Allagaateqarfiata 1987-imi saqqummersitaaniittut aamma "Nunatsinni kommunini toqqortanik toqqortarinnineq atorunnaarsitsisarnerlu pillugit aalajangersakkat" 1991-imi Nunatta Katersugaasiviata Allagaateqarfiatalu saqqummersitai.